

21 NOV 1996

Razaleigh-Mahathir

KU LI AJAK RAKYAT KELANTAN PENUHI HASRAT DR MAHATHIR

GUA MUSANG, 21 Nov (Bernama) -- Bekas Presiden Parti Melayu Semangat 46 (S46) Tengku Razaleigh Hamzah yang kini menjadi anggota Umno mengajak rakyat Kelantan menyokong Barisan Nasional (BN) bagi sama-sama menjayakan hasrat Perdana Menteri Datuk Seri Dr Mahathir Mohamad.

"Dr Mahathir kini tidak ada masalah lagi untuk difikirkan bagi mencapai wawasannya menjadikan Malaysia negara maju apabila semua negeri bersatu kecuali Kelantan yang masih mundur di bawah pemerintahan Pas," katanya ketika berucap kepada 1,500 orang pada majlis makan malam anjuran MCA bahagian ini.

Tengku Razaleigh yang juga anggota Parlimen Gua Musang berkata rakyat Kelantan tidak boleh membiarkan negeri ini terus dianggap sebagai "mengamalkan politik berbeza" hingga menyebabkan Kelantan menjadi mundur.

"Selagi kepimpinan di Kelantan tidak diubah dan bentuk pemikiran pemimpinnya (Pas) tidak ditukar maka sukar untuk kita bawa pembangunan walaupun kerajaan pusat sedia membantu," katanya.

Tengku Razaleigh berkata bagaimanapun sejak akhir-akhir ini rakyat Kelantan termasuk pemimpin Pas sendiri telah menyedari hakikat kedudukan negeri ini yang ketinggalan dalam serba-serbi termasuk kemudahan infrastruktur.

Katanya ekoran itu pemimpin Pas kini bersedia untuk menimbangkan menubuhkan kerajaan campuran dengan Barisan Nasional di Kelantan.

"Bagaimanapun sekiranya kita dapati Pas tidak jujur, marilah kita lancarkan gerakan besar-besaran untuk menumbangkan kerajaan negeri sekarang bagi menunjukkan kebangkitan rakyat," tambahnya.

Menurutnya barisan kepimpinan Umno di Kelantan kini sudah berbeza daripada sebelum ini apabila mereka telah bersatu dan berpakat untuk menguasai semula Kelantan yang terlepas ke tangan Pas pada pilihan raya 1990.

Katanya, sebagai mewakili kesemua bekas pemimpin dan anggota S46, beliau berjanji untuk "melakukan apa sahaja yang patut agar Kelantan dapat dibawa ke pangkuan Umno semula".

"Tetapi saya tetap berharap kerjasama Pas dan Umno akan menjadi realiti dan jika sebaliknya berlaku, maka sudah tiba masanya rakyat memberi kata putus kepada Pas untuk menumbangkan kerajaan mereka," katanya. -- BERNAMA

RAR NMO